

Бугримова Анжелика Дмитриевна

Кутир-катир

Кутирöй–Катирöй,

Печуркаам кольöма челядьöй.

Кутирöй–Катирöй,

Сёр вылам кольöма печканöй.

Кутирöй-Катирöй,

Горсьям кольöма каттьöмöй.

Дум вылö уси мамöлөн сьылöм. Во чöж ог и думыштлы та йылысь, а мыйöн матыстчас Рöштво, сідз ачыс и воö юрö.

Кодкö эськö тiян пöвстысь тöдö оз Кутир-Катирсö, кодi сийö да мыйöн сийöс сейöны? Онöй? Сідзкö, кывзыштöй менö.

Кутир-Катирыс – олыся, кодi олö Мале грездын. Но кызди олö? Да зэв тешкодя. Сöмын январ сизимöд лунсянь январ дас öкмысöд лунöдз, öстальной кадсö сийö пö дзебсясьö да кыйöдчö челядь бöрся, медся нин ёна пустöйяс бöрся.

- Мыйла челядь бöрся? - юаланнуд тi.

А со мыйла. Важ йöз вöлöмаöсь зэв мудер йöзөн, торйөн нин малесаясуд. Кутир–Катирыс налөн вöлöма аслысьяма воспитательён. Шулöмаöсь, мый пустöй челядьсö Кутир–Катирыс кыйöдас да кыскыштас юкмöсö, но оз ставнысö, а сöмын кывзысьтöмъясöс. Мамö шулывліс:

- Энö пустуйтöй, а то Кутир–Катируд ставсö аддзö, нуас да, он и тöдлöй.

Ок и ёна сыысь полі. Пустуйтнытö эг лысьтлы, но корсюрö, дерт, эг жö кывзысьлі. Дзик пустуйтгöгыд кагайдлы некыз. Помнита, коркö тöвнас мамököд лэччим лавкаö. Туйыс кузь, километра кык лоö, да нöшта на и кык шор колö вуджны, буретш Кутир–Катирлөн гуляйтан кад, рытладор нин

вөлі. Воим Шорпос дорөдз, видзөда да, шорыс быттьө вощыштөма. Öнi, дерт, төда, мый шорыс ватлалiс, а сэки, ичөт на вөлі да, эг төд. Аддзи тайөс да пыр жө и юалi мамлысь:

– Мам, тайө Кутир-Катирыдлөн шорсьыс петанiныс?

Мам шуө:

– Да, дитюк, сылөн тай.

А ачыс нюмъялө.

Юрөй тайө кывьяссө кылөм бөрын зэв сюся кутiс öтарө-мөдарө бергавны. Сэсса берег пөлөнсьыс казялi кос дзоридзьяс, лымйыс абу тыртөма, вель уна тыдалө. Бара мамлысь юала:

– Мамө, а тайө Кутир-Катирыдлөн дзоридзьясыс?

– Сылөн, дитя, сылөн, - нюмъялөмөн вочавидзө мам.

Та бөрся менам синьясөй öтарө видзөдiсны шор боклань. Став пустуйтан грекөй сэки юрө воис. Да нөшта и дзоридзьясыд на легны кутiсны, төвзысьыштiс буракө да.

– Мам, а кор Кутир-Катирыс петө шорсьыс, дзоридзьясыс шаркөдчөны? - водзө юася.

– Ог и помнит, гашкө, батьөй вөлі шуө, мый шаркөдчөны да, - шуө мам.

Тайөс кылөм бөрын ме зэв өдйө кутчыси мам киө.

– Мый нө, пакөститчин али мый да Кутир-Катирсьыд повзин? - небыдика юалiс мам.

– А тэ өд менө Кутир-Катирсьыд дорьян? Ме неуна и пустуйтыштлы, ме тэд висьтала, дзик збыль, ставсө висьтала, сөмын Кутир-Катирыслы эн сет.

– Ог жө Кутир-Катирлы сет муса нылукөс, ме и ачим дзолядырйи вөлі пустуйтла.

Мамлөн кывьяс бөрся став повзөдчан мөвпяс кытчөкө вошисны. Мамөй менө оз сет тайө злөдейыслы, сйө менө дорьяс. Но пустуйтнытө, дерт, ковмас дугдыны, мамөй өд оз век дiнын ло, и пемдөм бөрад тайө кадколастас

менö некод некытчö оз петкöд, сöмын пывсянö пуля моз лэбыштла. Пывсяныс эськö керкакöд орччөн, но и шорыс öд дзик жö орччөн. Ог тöд, кокöй инмывлö оз вöлі гортö кайигөн. Дум вылö усьлас öнi да вель ёна серам петö. Тöда öд, Кутир-Катирыс абу. Гашкö, та понда и челядьыс Малеад торъялöны мукöд грездаяссьыс асланыс шаньлунөн.

Ыджыд батыöй мамлы ичöтдырйисö Кутир-Катир йылысь сывлöма да висьтавлöма, мамыöй — меным, а ме кута аслам челядьлы висьтавны.

Со и тi тöдмалiнныд, кодi сэтшöмыс Кутир-Катирыс.

